

遼金元三朝宮詞

全



吳興劉氏
嘉業堂刊

遼宮詞

吳興叢書

烏程陸長春簫士著

開國雄圖始漢城宮闈神策定兼并鹽池杯酒戎機伏
却勝天皇十萬兵

薛居正舊五代史阿保機自稱皇帝署中國官號別
作一城以實漢人名曰漢城 葉隆禮契丹國志初
契丹有八部族之大者曰大賀氏後分爲八部部之
長號大人而常推一人爲王建旗鼓以統八部每三
年則以次相代及阿保機乃曰中國之主無代立者
由是阿保機益以威制諸國不甯代其立九年諸部
共責誚之阿保機不得已傳其旗鼓而謂諸部曰吾

立九年所得漢人多矣吾欲別自爲一部以治漢城
可乎諸部將許之漢城在炭山東南灤河上有鹽鐵
之利乃後魏滑鹽縣也 又阿保機用其妻述律策
使人告諸部大人曰我有鹽池諸部所食然諸部知
食鹽之利而不知鹽有主人可乎當來犒我諸部以
爲然共以牛酒會鹽池阿保機伏兵其旁酒酣伏發
盡殺諸部大人復併爲一國東北諸夷皆畏服之

又神冊元年阿保機始自稱皇帝國人謂之天皇王
陳桎通鑑綱目補編阿保機卽皇帝位北宰相蕭
阿只南宰相耶律歐理思率其下上尊號曰天皇帝
后述律氏曰地皇后

蠡角聲中響佩環指麾胡馬度熊山黃頭臭泊都驚竄
親見鑾輿破敵還

田況儒林公議契丹每興兵擾塞則傳一矢爲信諸
國皆震懼奔會無後期者每戰必銜枚無誼傳指顧
令統帥之下各有部隊晝戰則望旗幟遇夜則或鳴
鉦或吹蠡角或爲禽鳥之聲各隨部隊撒卷而去至
明不遺一騎元混一輿地要覽大甯路遼爲中京
有瑯瑁山熊山脫脫等遼史后妃傳述律后簡重
果斷有雄略太祖行兵御眾后嘗與謀太祖嘗渡磧
擊黨項黃頭臭泊二室韋乘虛襲之后知勒兵以待
奮擊大破之名震諸夷

四樓粉雉列崇墉千里榆關久息烽聞說至尊喜游獵
彎弓彊屋射黃龍

趙志忠虜廷雜記太祖於所居大部置樓謂之西樓
今謂之上京又於其南木葉山置樓謂之南樓又於
其東千里置樓謂之東樓又於其北三百里置樓謂
之北樓太祖四季常游獵於四樓之間 許亢宗奉
使行程錄離營州東行六十里至榆關 路振乘軺
錄榆關在薊州北百餘里 契丹國志太祖游獵彌
旬不止有黃龍在其彊屋上連發三矢殪之龍墜於
前後太子德光於其地建州黃龍府卽其地也
渤海妖氛已蕩平遼東山色馬頭迎短簫盡唱饒歌樂

車駕歸來鐵鳳城

劉效祖四鎮三關志神冊四年契丹主阿保機并渤海盡有遼東置東平郡收復故城鑄鐵鳳鎮之號鐵鳳城遼史樂志鼓吹樂一曰短簫鐃歌樂自漢有之謂之軍樂

小隊弓韉簇錦瑜毗狸黃鼠滿芳厨葡萄酒熟天顏喜
新進燕雲益地圖

王闢之澠水燕談契丹國產大鼠曰毗狸形類大鼠而足短極肥其國以爲殊味穴地取之以供國王之膳自公相以下不可得而嘗常以羊乳飼之頃年北使嘗攜至烹以進御沈括夢溪筆談刁約奉使契

丹爲北語詩云押宴移離畢看房賀跋支餞行三匹
裂密賜十貔狸注貔狸形如鼠而大穴居食果穀嗜
肉遼人以爲珍膳味如狍子而脆 劉績霏雪錄北
方黃鼠味極肥美恆爲玉食之獻置官守其處人不
得擅取也 司馬光資治通鑑契丹主作冊書命石
敬瑭爲大晉皇帝自解衣冠授之割幽薊瀛莫涿檀
順新媯儒武雲應寰朔蔚十六州以與契丹仍許歲
輸帛三十萬匹 遼史太宗紀會同元年十一月晉
復遣趙瑩奉表來賀以幽薊瀛莫涿檀順媯儒新武
雲應朔寰蔚十六州并圖籍來獻

東來紫氣接天閭聖母宮中賜酒漿却喜遐荒備文物

盡收圖籍到遼陽

資治通鑑契丹述律太后遣使以其國中酒饌脯果
賜契丹主賀平晉國契丹主與羣臣宴於永福殿每
舉酒立而飲之曰太后所賜不敢坐飲 遼史太宗
紀大同元年三月壬寅晉諸司僚吏嬪御宦寺方技
百工圖籍麻象石經銅人明堂刻漏太常樂譜諸宮
懸鹵簿法物及鎧仗悉送上京

通天冠峻九旒垂袍笏分班拜舞遲紫袖昭容誇創見
龍庭誰識漢官儀

資治通鑑二月丁巳朔契丹主服通天冠絳紗袍登
正殿設樂縣儀衛於庭下制稱大遼 契丹國志會

同十一年二月朔帝冠通天冠絳紗袍執大圭視朝
華人皆法服北人仍胡服立於文武班百官朝賀
歐陽修五代史大同元年三月丙戌朔德光服韡袍
御崇元殿百官入閣德光大悅顧其左右曰漢家儀
物其盛如此我得於此殿坐豈非真天子耶

捷書昨夜過龍堆闌外銀牌火速催贏得六宮齊一笑
石家新婦表函來

張舜民使北記銀牌形如方響刻番書宜速二字使
者執牌馳馬日行數百里所至如國主親到需索更
易無敢違者 王易燕北錄銀牌三道上番書朕字
用金鍍銀成見在內侍右承宣朱璘處收掌用黑漆

匣盛每日於戎主前呈封一徧或有緊急事宜用此
牌帶在項上走馬於南北大王處抽發兵馬餘事卽
不用之 契丹國志晉皇太后降表稱晉室皇太后
新婦李氏妾言

天錫神州降聖皇懷中黑兔早呈祥祭山儀畢回龍馭
禮佛先來菩薩堂

遼史地理志降聖州本大部落東樓之地太祖春月
行帳多駐此應天皇后夢神人金冠素服執兵仗貌
甚丰美異獸十二隨之中有黑兔躍入后懷因而有
娠遂生太宗 又禮志祭山儀皇帝服金文金冠白
綾袍絳帶縣魚三山絳垂飾犀玉刀錯絡縫烏韉

又太祖幸幽州大悲閣遷白衣觀音像建廟木葉山
尊爲家神於拜山儀過樹之後增詣菩薩堂儀一節
秦再思洛中紀異契丹主德光嘗晝寢夢一神人
花冠美姿容輜輶甚盛自天而下衣白衣佩金帶執
金骨朵有異獸十二隨其後內一黑色兔入德光懷
而失之神人語德光曰石郎使人喚汝汝須去覺告
其母母忽之不以爲異後復夢卽前神人也衣冠儀
貌宛然如故曰石郎已使人來喚汝旣覺而驚復以
告母母曰可命筮之乃召胡巫筮言太祖從西樓來
言中國將立天主要爾爲助爾須去未浹旬石敬瑭
反於河東爲後唐張敬達所敗亟遣趙瑩持表重賂

許割燕雲求兵爲援契丹帝曰我非爲石郎興師乃奉天帝敕使也率兵十萬直至太原唐師遂衄立石敬瑭爲晉帝後至幽州城中見大悲菩薩佛相驚告其母曰此卽向來神人冠冕如故但服色不同耳因立祠木葉山名菩薩堂德光生於癸卯年黑兔入懷此其兆也

殿頭歌舞脫戎衣南國花枝見亦稀卻笑胡兒偏眼熱盡停酒琰看唐妃

孫光憲北夢瑣言莊宗嫡夫人韓氏後爲淑妃伊氏爲德妃契丹入中原陷於虜廷宰相馮道尊冊契丹王虜帳宴集其國母后妃列坐同宴王嬙蔡姬之比

也

桐酒燒羊侍宴游春寒纔換黑貂裘椒房易姓都從漢
勲業何人媿鄼侯

契丹國志貴者被貂裘貂以紫黑色爲貴青色爲次
又契丹所貴惟耶律與蕭二姓后一入宮正位椒
房凡后族皆以蕭爲氏 周春遼金元姓譜太祖慕
漢高以后族比蕭相國故命爲蕭氏 通鑑補編契
丹之后族多乙室氏拔里氏契丹主慕漢高祖命耶
律兼稱劉氏后弟敵魯旣爲北府宰相遂自比蕭相
國由是與乙室拔里兼稱蕭氏

塞垣曉日射旌旄海澱波光映戰袍一騎紅塵南使到

瑛盤分賜紫櫻桃

遼史太宗紀會同四年夏四月晉遣使進櫻桃王
欽若等冊府元龜天福七年閏三月遣殿直官馬延
理內班王延斌送櫻桃於契丹

沈沈宮禁靜無譁五鳳樓開理鬢鴉怪底君王眠不醒
春風閒煞掖庭花

王士點禁扁樓之扁曰五鳳契丹國志穆宗年少
好遊戲不親國事每夜酣飲達旦乃寐日中方起國
人謂之睡王

弓開滿月箭流星鴛泊迷漫水氣腥毛血亂飛鵝鴨落
脫鞬新放海東青

孫世芳宣府鎮志鴛鴦泊在雲州堡西北一百餘里
境周圍八十里其水停積不流自遼金以來爲飛放
之所 遼史地理志延芳淀方數百里春時鴛鴦所
聚夏秋多菱芡國主春獵衛士皆衣墨綠各持連鎗
鷹食刺鴛雖列水次相去五七步上風擊鼓驚鴛稍
離水面國主親放海東青鶻擒之鴛墜恐鶻力不勝
在列者以佩錐刺鴛急取其腦飼鶻得頭鴛者例賞
銀絹 契丹國志女真東北與五國爲鄰五國之東
接大海出名鷹自海東來者謂之海東青小而俊健
能擒鴛鴦爪白者尤以爲異遼人酷愛之歲歲求之
女真女真至五國戰鬪而後得女真不勝其擾 李

肅續資治通鑑長編長泊多野鵝鴨遼主射獵領帳
下騎擊扁鼓遶泊驚鵝鴨飛起乃縱海東青擊之或
親射焉遼人皆佩金玉錐號殺鵝鴨雖每初獲卽拔
毛插之以鼓爲坐遂縱飲最以此爲樂 徐夢莘三
朝北盟會編海東青者出五國五國之東接大海自
海東而來者謂之海東青小而俊健爪白者尤以爲
異必求之女真每歲遣外鷹坊子弟趣女真發甲馬
千餘人入五國界卽海東巢穴取之與五國戰鬪而
後得其後女真不勝其擾 遼金紀事海東青出於
女真東北鉄甸等五國遼主延禧酷愛之每歲大寒
發使趣女真以海東青入貢發甲馬數百取之五國